



DATU PERTSONALAK BABESTEARI ETA DATUAK BABESTEKO EUSKAL AGINTARITZARI BURUZKO LEGE-AURREPROIEKTUA

ZIOEN AZALPENA

I

Datu pertsonalen babesaren alorreko arau-esparruak aldaketa handia izan zuen 2018ko maiatzaren 25ean, 2016ko apirilaren 27ko 2016/679 (EB) Erregelamendua onartu zenean (datu pertsonalen tratamenduari dagokionez pertsona fisikoen babesari eta datu horien zirkulazio askeari buruzko arauak ezartzen dituen eta 95/46/EE Zuzentaraua indargabetzen duena). Erabilera orokorrean, Datuak babesteko Erregelamendu Orokorra deitu ohi zaio.

2016/679 (EB) Erregelamenduak zuzeneko eragin osoa du estatu kideetan, eta funtsezko berritasunak dakartza, bai datuak babesteko oinarrizko eskubidearen oinarrizko erregulazioari dagokionez, bai eskubide hori «kontrol-agintaritzaren» izenekoek —alegia, estatu kide bakoitzak tratamenduari dagokionez pertsona fisikoen oinarrizko eskubideak eta askatasunak babesteko eta datu pertsonalen zirkulazio askea errazteko ezarriko dituen agintaritzaren publiko independenteek— gainbegiratzeari dagokionez. Estatuan datu pertsonalen babesa erregulatzeko lehenengo arauak onartu zirenetik, haiek gainbegiratzeko araubidearen barruan kontrol-agintaritzaren bat baino gehiago egon dira indarrean aldi berean, bai Estatukoa, bai autonomia-erkidegoetakoak, zeinek bere eskumen-eremu bereziak dituela.

Datuak babesteko Erregelamendu Orokorrak, bestalde, kontrol-agintaritzek bete behar dituzten eginkizun eta ahalen sorta zabal-zabala ezartzen du. Agintaritzaren horiek bitarteko egokiak izan beharko dituzte haien independentzia behar bezala bermatuta egon dadin, independentzia hori baita oinarrizko eskubidearen babes egokirako funtsezko printzipioetako bat.

Barne-zuzenbidea Erregelamendura egokitzeko asmoz, abenduaren 5eko 3/2018 Lege Organikoa, Datu Pertsonalak Babesteko eta Eskubide Digitalak Bermatzekoa, onartu zen. Lege horrek, VII. tituluko II. kapituluan, datuak babesteko agintaritzaren autonomikoak izenekoak aztertzen ditu.

Geroago, Europako Parlamentuaren eta Kontseiluaren 2016ko apirilaren 27ko 2016/680 (EB) Zuzentarauaren transposizioaren ondorioz (pertsona fisikoak babestearen gaineko zuzentaraua, agintari eskudunek arau-hausteak edo zigor penalak prebenitu, ikertu, detektatu edo epaitzeko asmoz datu pertsonalak

tratatzeari buruz eta datu horiek aske zirkulatzeari dagokionez, eta Kontseiluaren 2008/977/JAI Esparru Erabakia indargabetzen duena), maiatzaren 26ko 7/2021 Lege Organikoa onartu da, arau-hauste penalak prebenitu, detektatu, ikertu eta epaitzeko eta zehapen penalak betearazteko tratatzen diren datu pertsonalak babesteari buruzkoa (aurrerantzean, 7/2021 LO). Lege organiko horren xedea da agintari eskudunek datu pertsonalak tratatzeari dagokionez pertsona fisikoak babesteari buruzko arauak ezartzea, arau-hauste penalak prebenitzeko, detektatzeko, ikertzeko eta epaitzeko edo zehapen penalak betearazteko, segurtasun publikoaren aurkako mehatxuetatik babestea eta prebenitzea barne.

Aurreko gogoetak kontuan hartuta, Datu Pertsonalak Babesteko lege hau egin da, zeinaren helburua baita Euskadin aplikatzekoa den araudiaren antolamendua eta funtzionamendua egokitzea lege-arau hauen aurreikuspenetara: 2016/679 (EB) Erregelamendua; 3/2018 Lege Organikoa, abenduaren 5ekoa, Datu Pertsonalak Babesteari eta Eskubide Digitalak Bermatzeari buruzkoa, eta 7/2021 Lege Organikoa, maiatzaren 26koa, arau-hauste penalak prebenitu, detektatu, ikertu eta epaitzeko eta zehapen penalak betearazteko tratatzen diren datu pertsonalak babesteari buruzkoa.

Horrela, lege honek ordeztu egiten du Datu Pertsonaletarako Jabetza Publikoko Fitxategiei eta Datuak Babesteko Euskal Bulegoa Sortzeari buruzko otsailaren 25eko 2/2004 Legean eta hura garatzeko arauetan jasotako araubidea, bereziki urriaren 18ko 308/2005 Dekretua, aipatutako 2/2004 Legea garatzen duena, eta urriaren 18ko 309/2005 Dekretua, Datuak Babesteko Euskal Bulegoaren Estatutua onartzen duena.

Legea egiterakoan, kontuan hartu da datu pertsonalen babeserako oinarritzko eskubidea taxutzen duten printzipio, eskubide eta betebeharren araubidea behar bezala erregulatuta dagoela Datuak babesteko Erregelamendu Orokorrek bildutako xedapenetan eta, osagarri gisa, Datu Pertsonalak Babesteko eta Eskubide Digitalak Bermatzeko Legearen xedapenetan, eta, horrenbestez, ez dela beharrezkoa oinarritzko eskubidearen funtsezko edukiarekin lotutako xedapen gehigarririk hartzea. Ildo beretik, aintzat hartu da bi arau horiek dagoeneko betebeharren esparru aski argia ezartzen dutela, hots, arau autonomikoak esparru hori osatu beharrik gabe; bestela, betebehar-araubide sobera burokratikoak ezarriko litzaieke haren aplikazio-eremuaren mende dauden administrazio eta entitateei.

Premisa hori kontuan hartuta, Legea lau kapitulutan egituratu da, eta lehenengoak Legearen xedea eta aplikazio-eremua jorratzen ditu, besterik ez. Gainerako hiru kapituluetan ezartzen da zein izango den gaur egungo Datuak Babesteko Euskal Bulegoa ordeztuko duen Datuak Babesteko Euskal Agintaritzaren araubidea, baita zein den Legearen aplikazio-eremuaren barruan dauden tratamendu-arduradun eta -eragileen zehapen-araubidea ere, eta zein prozedura bete beharko den Euskal Agintaritzak interesdun baten erreklamazio bat izapidetu behar duenean edo bere ikertzeko ahalak egikaritu behar dituenean edo, hala badagokio, zehapen-ahalak bete behar dituenean, ofizioz edo izapideak Estatuko nahiz beste estatu kide bateko beste kontrol-agintaritza batek

eskatu dituenean, Datuak babesteko Erregelamendu Orokorrean ezarritako prozedura-arauei jarraituz.

II

Lege honek berrogeita bi artikulua ditu, honela antolatuta: lau kapitulu, bi xedapen gehigarri, bi xedapen iragankor, xedapen indargabetzaile bat eta azken xedapen bat.

Lege honen xedea da datuen babesaren arloko EAEko araudia egokitzea 2016/679 (EB) Erregelamendura, Datu Pertsonalak Babesteko eta Eskubide Digitalak Bermatzeko abenduaren 5eko 3/2018 Lege Organikora, bai eta Arauhauste penalak prebenitu, detektatu, ikertu eta epaitzeko eta zehapen penalak betearazteko tratatzen diren datu pertsonalak babesteari buruzko maiatzaren 26ko 7/2021 Lege Organikora ere; horretarako, bereziki, Datuak Babesteko Euskal Agintaritzaren araubide juridikoa ezarriko du.

Legearen aplikazio-eremu subjektiboa mugatzeko, kontuan hartzen da tratamenduaren arduradun diren entitateak sektore publikoak direla edo tratamendua lotuta dagoela ahal juridiko publikoak egikaritzearekin, sektore publikoa deritzonak egiten dituen datu-tratamendu guztiak arautzeko.

Hala, aplikazio-eremuaren barruan sartzen dira Autonomia Estatutuak arautzen dituen erakundeak tratamendu-arduradun dituzten tratamenduak, hala nola Eusko Legebiltzarra, lurralde historikoetako batzar nagusiak, Herri Kontuen Euskal Epaitegia eta Arartekoa, bai eta Eusko Legebiltzarrak legez sortutako entitateak eta administrazio-agintaritza independenteak ere. Era berean, Eusko Legebiltzarreko legebiltzar-taldeak, lurralde historikoetako batzar nagusietako batzar-taldeak eta udaletako talde politikoak, Euskal Herriko Unibertsitatea, Euskal Unibertsitate Sistema osatzen duten gainerako unibertsitateak eta horien mendeko erakundeak ere sartzen dira.

Halaber, Datuak Babesteko Euskal Agintaritzaren eskumen-eremuaren mende daude interes ekonomikoak eta profesionalak ordezkatzeko dituzten zuzenbide publikoko korporazioen ardurapean dauden tratamendu guztiak.

Azkenik, sektore pribatuari dagokionez, Legearen xedapenen mendean jartzeko hiru kasu bereizi behar dira: Lehenengoz, Legearen aplikazio-eremuaren barruan sartuko dira pertsona fisikoak eta juridikoak, baldin eta tratamendua egiten bada sektore publikoa osatzen duten administrazio publikoen eskumeneko arloetan eginkizun publikoak egikaritzeko. Bigarrenaz, Legearen xedatutakoaren mendean geratuko dira edozein eratako zuzeneko zein zeharkako kudeaketaren bidez zerbitzuak ematen dituzten zuzenbide pribatuko entitateak, tratamenduen xedea zerbitzu horiek ematearekin lotuta dagoenean, ulertzen baita zerbitzu horiek kudeaketarako eskumenaren titulartasuna duen administrazioak ematen dituela. Azkenik, ez da ahaztu behar zuzenbide pribatuko entitate batzuek tratamendueragile gisa ematen dizkietela zerbitzuak sektore publikoko administrazio eta

entitateei. Entitate horiek Datuak Babesteko Euskal Agintaritzaren eskumenean geratuko dira, tratamenduaren arduradun den administrazio edo entitatearen jardura ere eskumen horren mende dagoelako.

Legearen mendeko jarduerak egiten dituzten arduradun edo eragileei dagokien aplikazio-eremu subjektiboarekin batera, Legearen aplikaziotik kanpo geratzen diren kasuak ere zedarritu behar dira, alegia: hilda dauden pertsonen buruzko tratamenduak eta sailkatutako gaiak babesteko araudiaren mende daudenak, besterik ez.

III

Legearen II. kapitulua sei ataletan banatuta dago, eta Datuak Babesteko Euskal Agintaritzaren araubide juridikoa ezartzen du. Agintaritza berriak gaur egungo Datuak Babesteko Euskal Bulegoa ordeztuko du, bigarren xedapen gehigarrian azaltzen denez. Hala, berebiziko aldaketa gertatzen da datuen babesaren arloko erakunde-antolaketan. Aldaketa horrek, Agintaritzaren izenaz harago, eragina du haren araubide juridikoan, antolaketan eta eskumenetan, horrela 2016/679 (EU) Erregelamenduak ezartzen duen eginkizun-sorta garatzen baita.

Lehen atalaren xedea Datuak Babesteko Euskal Agintaritzaren araubide juridikoa ezartzea da, abiapuntutzat hartuta kontrol-agintaritzak izan behar duen independentziaren funtsezko betekizuna, botere publikoen esku-sartzeak ez dezan eragotzi Agintaritzak esleituta dituen eginkizunak eta ahalak behar bezala egikaritzea. Independentzia horrek esan nahi du ezen kontrol-agintaritzak, bere eskumenak betetzean, ez duela inongo instrukziorik bete behar eta, horretaz gainera, bere eginkizunak eraginkortasunez betetzeko behar dituen giza baliabide eta baliabide material, tekniko eta finantzarioez hornituta egon behar duela.

Datuak Babesteko Euskal Agintaritzaren eskumenei dagokienez, Agintaritzaren eginkizun eta ahalak egikaritzean sortzen duen doktrina ez balego herritarren eta Agintaritzaren mendeko entitateen eskura, nabarmen mugatuta geratuko litzateke datuak babesteko oinarrizko eskubidearen ezaguera, eta, beraz, datu pertsonalak babesteko hartu beharreko bermeak murriztuta geratuko lirateke. Gardentasunaren arloan egin beharreko ahalegin horri erantzunez, Legeak betebeharrak gehigarri batzuk ezartzen ditu, lege ezarrita daudenez gainera, publizitate aktiboko betebeharrei dagokienez.

Nolanahi ere, ebazpen, irizpen eta agirien publizitatea ezin da geratu babesten den oinarrizko eskubidetik kanpo. Arrazoi horregatik, Legeak dio ezen, publizitatea egin aurretik, agiri horiek dituzten datu pertsonalak disoziatu egin behar direla, dagoeneko beste arlo batzuetan egiten den moduan (adibidez, ebazpen judizialen publizitatearen kasuan).

Bigarren atalean, Datuak Babesteko Euskal Agintaritzaren organoak arautzen dira. Legeak pertsona bakarreko ereduari eusten dio, eredu hori efektiboa izan

baita Datuak Babesteko Euskal Bulegoak jardun duen hamabost urtetik gorako denbora honetan; gainera, eredu hori bat dator Estatuan sortutako datuak babesteko gainerako agintaritzetan dagoen ereduarekin. Organo horri laguntza emango dio betearazpen-ahalik ez duen kontseilu aholku-emaile batek, zeinari iritzia eskatuko baitzaio organoaren eskumenak behar bezala egikaritzeko garrantzitsuak diren gai guztietan..

Agintaritzaren organo betearazlearen izena aldatzen da; aurrerantzean, «Lehendakaritza» izango da eta, horrela, haren maila argituko da. Haren independentzia indartzeko, beste prozedura bat diseinatu da hura izendatzeko. Prozedura horretan botere betearazleak eta botere legegileak esku hartuko dute. Gainera, Agintaritzaren lehendakaria kargutik kentzeko kasuak murriztu egin dira eta, gainera, kargudunak berak hala eskatuta edo zigor-kondena batengatik gertatzen diren kasuetan izan ezik, beste guztietan Eusko Legebiltzarrak esku hartu beharko du.

Agintaritzaren lehendakariaren agintaldiak bost urte iraungo du; modu horretan bermatuko da legegintzaldiaren iraupen bera ez izatea eta, era berean, instituzioaren independentzia sendotzea, baita izendapenean adostasuna sustatzea ere.

Azkenik, Agintaritzaren lehendakariaren maila ere sendotzen da, goi-karguduna izango baita, sailburuordeen parekoa. Dena dela, Legea indarrean jarri ostean Lehendakaritzarako lehenengo izendapena egiten denetik aurrera parekatuko da, ez lehenago.

Hirugarren atalean, Agintaritzaren ikerketa-eskumenak nabarmentzen dira, eskumen horietan arreta handiagoa jarri behar baita; izan ere, haien bitartez eskubidea babesteko neurri proaktiboak har daitezke, eta eskubidea urratu den kasuetarako neurri erreaktiboak ere bai, beharrezkoak diren zehatzeko ahalak egikaritzuz. Onartzen da Agintaritzak ikerketa-ahalak egikaritzeko duen eskubidea eta, horretarako, aldizkako edo unean uneko ikuskapenak egin ahalko ditu —baita auditoretza-planak ere—, ofizioz edo ukitutako pertsonak eskatuta, bere eskumeneko edozer tratamenduri buruz.

Administrazio publikoen ikerketa-ahalak erregulatzen dituzten beste arau batzuen esparruan bezala, hala nola zergen arloan, Agintaritzarekin lankidetzan aritzeko betebeharrak orokorra ezartzen da, eta hari bere eskumenen esparruan ikerketa-jarduerak gauzatzeko beharrezkoak dituen datuak, txostenak, aurrekariak eta egiaztagirak eman beharko zaizkio. Berezi, foru-ogasunek lankidetzan aritzeko duten betebeharrak aipatzen da. Nolanahi ere, bazter geratzen dira telekomunikazio-operadoreek urriaren 18ko 25/2007 Legean —komunikazio elektronikoen eta komunikazioen sare publikoen datuak gordetzeari buruzkoan— ezarritako eginbeharrak betetze aldera eskusiboki gordetzen dituzten datuak.

Berritzaileak direnez, aipamen berezia merezi dute laugarren atalean biltzen diren eskumen arautzaileek. Hala, Agintaritzak, Lehendakaritzaren bitartez —



Agintaritzaren organo beterezlea den aldetik—, zirkularrak egin ahalko ditu Agintaritzaren eskumeneko tratamenduei buruz, 2016/679 (EB) Erregelamenduan eta datu pertsonalen babeserako gainerako araudian ezarritakoa aplikatzen duenean bere jardunbidearen irizpideak finkatzeko. Zirkular horiek nahitaez bete beharko dira Euskal Herriko Agintaritzaren Aldizkarian argitaratu ondoren.

Bosgarren atalean, Datuak Babesteko Euskal Agintaritzaren beste eginkizun oso desberdin batzuk arautzen dira, hala nola: subjektu gisa parte hartzea kanpo-ekintzan edo nazioarteko administrazio-akordioak egiten, hala aurreikusten duten eta bere eskumeneko gaiet buruzkoak diren nazioarteko tratatuak gauzatuz eta zehaztuz; datuen nazioarteko transferentzietan dagokienez haren esku-hartzea beharrezkoa den kasuak; aitortzen da Agintaritzaren eskumena dela Legearen aplikazio-eremuaren mende dauden subjektuek egindako tratamendu-jarduerak arautuko dituzten jokabide-kodeak onartzea; Legearen aplikazio-eremuaren barruan dauden arduradun eta eragileek egindako tratamendu-jardueretarako dagokienez datuen babesaren arloko ziurtapen-erakunde edo -entitateak egiaztatzea, eta, azkenik, datu pertsonalak babesteko prestakuntza, zeren eta Datuak Babesteko Euskal Agintaritzak datu pertsonalak babesteko araudian jasotako xedapenen zabalkundea sustatuko baitu, herritarrek datu horiek babesteko izateko duten oinarritzko eskubidea behar bezala ezagutzen dutela bermatzeko, bai eta arduradunek ere, eskubide hori errespetatu dadin arau horiek ezartzen dizkieten eginbeharrak betetzen dituztela bermatzeko.

Azkenik, seigarren atalak datuak babesteko Estatuko gainerako agintaritzekin izan beharreko harremanaren funtsezko alderdiak ezartzen ditu. Datuak babesteko Estatuko gainerako agintaritzekin lankidetzan instituzionalean aritzeko printzipio hori sakon aztertzen du, eta agerian jartzen du errotiko lotura daukala kontrol-agintaritzen izatearekin berarekin; izan ere, agintaritzen lankidetzan, elkarlan eta koordinazio egoki baten bidez lortzen da datu pertsonalen babeserako oinarritzko eskubidea behar bezala babestea. Alde horretatik, aurreikusten da Datuak Babesteko Euskal Agintaritzak ahala izango duela datuak babesteko Estatuko gainerako agintaritzekin lankidetzarako protokolo, akordio eta hitzarmenak sinatzeko, instituzioen arteko lankidetzan garatzeko beharrezkoak badira.

Halaber, ikerketa-jarduketan bateratuak egitearen garrantzia azpimarratzen da, eta auditoretza-plan bateratuak garatzeko aukera, baita mugaz gaindiko prozeduren esparruan lankidetzan jarduketak egiteko ere.

IV

Legearen III. kapituluak zehapen-araubidea erregulatzen du, eta horren mende geratzen dira Legearen aplikazio-eremuan sartzen diren tratamenduen arduradunak eta eragileak, bai eta Datuak Babesteko Euskal Agintaritzak onartutako jokabide-kodeak gainbegiratzeko egiaztatutako entitateak ere, eta Agintaritzak egiaztatutako ziurtapen-entitateak.

Datuak babesteko Erregelamendu Orokorraren alderdi berritzaile nagusietako bat da zehapen-esparru uniformearen ezartzen dela Europar Batasun osoan egiten diren datu-babesaren urraketen aurka erreakzionatzeko. Modu horretan, Erregelamenduak berak zehazten du zer ohiko jokabide diren arau-hauste eta, arau-haustea eginez gero, zer zehapen-araubide aplikatu behar den.

Aldi berean, xedapen horien osagarri dira, estatu-eremuan, estatu kideen barne-arauek, zeinetara, helburu bera dutenez, egokitzen baitu lege honek datu-babesaren alorreko EAEko araudi autonomikoa, bertako artikuluetan jasotzen diren xedapen zehatzen bidez.

Legeak argi eta garbi bereizten ditu sektore publikoari aplikatu beharreko zehapen-araubidea eta sektore pribatuari aplikatu beharrekoa. Azken horri dagokionez, Legean jasotako arau-hausteetarako zenbait isun-zehapen aurreikusten dira, bai eta isunaren zenbatekoa mailakatzeko irizpideak ere; horiek kasu bakoitzaren inguruabarren arabera ezarriko dira, 2016/679 (EB) Erregelamenduan ezarritako neurrien gehigarri edo ordezkoko gisa.

Bestalde, lege honetan aipatzen diren arau-hausteen egilea baldin bada Legearen aplikazio-eremuan sartzen diren EAEko administrazio, entitate eta instituzio publikoetako bat, tratamenduaren arduradun edo eragile gisa jarduten ari dela, ez zaio diru-zehapenik ezarriko; horren ordezkari, ohartarazpena egingo zaio, jokabide horri amaiera emateko edo egindako arau-haustearen ondorioak zuzentzeko hartu beharreko neurri zuzentzaileak adieraziz.

Era berean, neurri espezifiko batzuk ezartzen dira, arau-hausteak agintariei, goikargudunei eta zuzendariei egotzi ahal zaizkien kasuetarako, baldin eta egiaztatu bada arau-haustea eragin zuen ekintza egin zela tratamendurako txosten teknikoetan edo gomendioetan oinarritutako irizpideen aurka eta irizpide horiei ez zitzaiela behar bezala jaramon egin. Kasu horretan, beren-beregi xedatzen da ezen zehapena ezartzeko ebazpenean ohartarazpen bat agertuko dela, arduradun den karguaren izendapenarekin, eta ohartarazpen hori Euskal Herriko Agintaritzaren Aldizkarian argitaratzeko aginduko da.

Azkenik, eta EAEko sektore publikoaren araubidearen bereizgarri gisa, aurreikusten da, oro har ezarritako neurriez gain, Euskal Autonomia Erkidegoko Administrazio Orokorreko eta Instituzionaleko kargu publikodunen eta behin-behineko langileen Etika eta Jokabide Kodean ezarritakoa aplikatuko dela, eta ematen diren zehapen-ebazpenen berri jakinaraziko zaiola Arartekoari.

Atal jakin honetan, gardentasun-printzipioak eskatzen du jarduera publikoa behar bezala azter dadila, jendeak jarduera hori nola egiten den jakin dezan; hala, jendeak jakingo du, halaber, kudeaketan desbideraketak noiz gertatzen diren.

Arrazoi horregatik, beren-beregi erregulatzen da publizitatearen araubide berezi bat sektore publikoan; araubide horren bidez, herritarrek jakin ahalko dute

sektore publikoa osatzen duten ente eta organismoek edo sektore pribatuan egonik jarduera hori betetzeko ardura dutenek araudia betetzen duten.

Hala, xedatzen da Euskal Herriko Agintaritzaren Aldizkarian argitaratuko dela Datuak Babesteko Euskal Agintaritzak ezarritako zehapen larrienei buruzko informazioa, alegia: arau-hauslea identifikatzen duen informazioa; egindako arau-haustea eta ezarritako zehapenaren diru-zenbatekoa, milioi bat eurotik gorakoa denean eta arau-hauslea pertsona juridikoa denean, eta datuak tratatzeko txosten teknikoei eta gomendioei muzin eginez jokaera arau-hauslea agindu duten agintari, goi-kargudun eta zuzendariei ezarritako ohartarazpenak.

Azkenik, eta zehapenen preskripzioari dagokionez, Legeak erabaki du 2016/679 (EB) Erregelamenduaren aurretik indarrean zeuden preskripzio-epeteei eustea, eta aurreko arau-esparruan zehapen arin, astun eta oso astunengatiko arau-hausteetarako aurreikusitako diru-zenbatekoen arabera epeak ezartzea. Gainera, Legearen helburua denez gero EAEko araudia maiatzaren 26ko 7/2021 Lege Organikoan jasotako xedapenetara egokitzea (7/2021 Lege Organikoa, arau-hauste penalak prebenitu, detektatu, ikertu eta epaitzeko eta zehapen penalak betearazteko tratatzen diren datu pertsonalak babesteari buruzkoa), lege organiko horretan aurreikusitako zehapenen preskripzio-epeteei ere erregulatzen ditu, diru-zenbatekoaren arabera.

V

IV. kapituluak bost atal ditu, eta datuak babesteko arauak urratuz gero jarraitu beharreko prozedurak erregulatzen ditu.

Lehenengo atalak (xedapen orokorrak) aplikatu beharreko araubide juridikoa eta prozedura eteteko arazoak erregulatzen ditu.

Abiapuntu gisa, Legeak bertan jasotzen diren arauen norainokoa zedarrizten du. Arau horiek ez zaizkie aplikatzen Datuak Babesteko Euskal Agintaritzak izapidetzen dituen prozedura guztiei, baizik eta administrazio-prozeduraren araudi orokorrean ezarrita dagoenarekin alderatuta berezitasunak eskatzen dituzten prozedurei soilik. Horrela, kapitulu honetan jasotako arauak aplikatuko diren hiru kasuak erregulatzen dira, eta zehapen-prozedurei subsidiarioki aplikatuko zaie Euskal Autonomia Erkidegoko administrazio publikoen zehatzeko ahalaren erabilera erregulatzen duen araudian ezarritakoa.

Horregatik, prozedura etetea kontuan hartzen da ez bakarrik oinarritzko araudian ezarritako kasuetan, baizik eta beste kontrol-agintaritza batzuei informazioa, kontsulta, laguntza edo aginduzko irizpena eskatu behar zaien kasuetan ere bai. Prozeduraren etenaldi horrek iraungo luke eskaria egiten den unetik Datuak Babesteko Euskal Agintaritzari irizpena jakinarazten zaion arte.

Bigarren atalak prozeduraren hasiera arautzen du, eta horren barruan sartzen dira erreklamazioa izapidetzeko onartzea eta egin beharreko aurretiazko jarduketak, hala nola kontrol-agintaritzaren eskumenaren azterketa, eta aukera

txertatzen da prozedura izapidetzea egokia den ala ez erabakitzeko. Horretarako, prozedurarekin jarraitzea desegokia litzatekeen zenbait kasu zerrendatzen ditu, eta prozedura ez onartzeko erabakitzea proposatzen du.

Era berean, aurreikusten da Datuak Babesteko Euskal Agintaritzak ofizioz erabaki dezakeela prozedura hastea, baldin badaki datu pertsonalak babesteko araudian xedatutakoa hautsi izanaren zantzuak daudela. Baliteke halaber prozedura hastea datuak babesteko beste agintaritza batek —Espainiako nahiz beste estatu kide bateko agintaritza batek— eskatuta.

Hirugarren eta laugarren atalek, hurrenez hurren, bi kasu hauetako prozeduraren izapidetzea arautzen dute: eskubideak baliatzearen ondoriozko erreklamazioen kasua, eta zehatzeko ahala baliatzeko prozeduraren kasua.

Legeak, gaur egun indarrean dagoen araudian dagoen irizpideari jarraikiz, bereizi egiten ditu, batetik, interesdunek datuak babesteko arauetan ezarritako eskubideak egikaritzearekin soil-soilik zerikusia duten prozedurak, eta, bestetik, zehapen-ahala egikaritzearekin zerikusia duten prozedurak. Zentzuzkoa denez, interesdunak egindako erreklamazioan bi uziak jasotzen badira, Datuak Babesteko Euskal Agintaritzak bi prozedura bereizi ireki ahalko ditu.

Aldea nabarmena da zeren helburua baita eskubideak betetzearekin zerikusia duen prozedurak —zeinak, gehienetan, ardatz izango baitu eskubideak bete egin zirela dioen frogaren balorazioari buruzko auzia edo, gehienez ere, eskubideok behar bezala bete ez izana— askoz gutxiago irautea zehapen-prozedurek baino. Izan ere, zehapen-prozeduretan, gainera, kautela-neurriak hartu ahalko dira eta neurri horiek bermatu egingo dute kaltetutako eskubideen konponketa azkarra, hala dagokionean.

Eskubideen egikaritzea eskatu arren eskaera hori aintzat hartu ezean egin beharreko prozedurei dagokienez, Legeak kontraesan-printzipioari eusten dio, eta ebazteko gehienez sei hilabeteko epea ezartzen du; epe horren ostean, interesdunak ulertu ahalko du bere eskaria ezetsi egin dela.

Azkenik, bosgarren atalak mugaz gaindiko tratamenduei buruzko prozeduren berezitasunak arautzen ditu. Legeak beharrezko arau-neurriak hartzen ditu, Datuak Babesteko Europako Erregelamenduak ezarritako egoera berriak kontuan hartuta. Zehazki, berezitasunak txertatzen ditu datuak babesteko agintaritza batek baino gehiagok prozedura ebazteko interesa duten kasuetan, eta bereizi egiten ditu, alde batetik, agintaritza nagusia, zeinaren jurisdikzioan baitago arduradunaren establezimendu nagusia, eta, bestetik, gainerako agintaritza interesdunak.

Halaber, berezitasun bat txertatzen du: prozeduraren ebazpena eman behar duen agintaritza bat edo bestea izango da, ebazpena era batekoa edo bestekoa den, errekurtsioa behar bezala jarri ahal izateko eragilearen establezimendu nagusiko jurisdikzio-organoei (zehapena ezarriz gero), erreklamazioa aurkeztu

den lekukoei (zehapenik ezarri ezean) edo batari zein besteari (erreklamazioan azaldutako arau-haustek osorik aintzat hartu ezean).

VI

Legeak bi xedapen gehigarri, bi xedapen iragankor, xedapen indargabetzaile bat eta azken xedapen bat.

Lehenengo xedapen gehigarrian, Datuak Babesteko Euskal Agintaritzak izapidetzen dituen baina lege honetan erregulatzen ez diren prozedurei aplikatu beharreko araudia aipatzen da; izan ere, prozedura horien jarduera administrazio-prozedura erregulatzen duen oinarrizko legeriaren eta legeria autonomikoaren mende geratuko da erabat.

Bigarren xedapen gehigarriak dio Datuak Babesteko Euskal Agintaritzak gaur egungo Datuak Babesteko Euskal Bulegoa ordeztu duela eta, beraz, bere gain hartzen dituela gaur egun indarrean dagoen araudian Bulegoari orain arte esleitu zaizkion eskumenak eta eginkizunak —besteak beste, gainbegiratzeko, kontrolatzeko, aholkua emateko edo txostenak egiteko eskumenak—; hortaz, Bulegoa dioten erreferentzietan Agintaritza aipatzen ari dela ulertu beharko da.

Lehenengo xedapen iragankorrek argitzen du Datuak Babesteko Euskal Agintaritzaren araubide berriak estatutu berri bat izatea exijituko duela, gaur egun indarrean dagoena ordeztuko duena. Dena dela, indarrean dagoen estatutuaren berezitasunak arazorik gabe aplikatu ahalko dira estatutu berria onartu arte, lege honetan ezarritakoaren aurka ez doan guztian. Aldi berean, azaltzen da ezen Datuak Babesteko Euskal Agintaritzaren lehendakariaren kargua sailburuordekarguarekin parekatzea eta Kontseilu Aholku-emaile berriaren osaketa gauzatuko direla haien izendapena egiten denean; alegia, lege hau indarrean jarzteak ez du esan nahi kargutik kenduko direnik ez Datuak Babesteko Euskal Bulegoko zuzendariaren lanpostuan dagoena, ez eta Aholku Batzordea osatzen dutenak ere.

Bigarren xedapen iragankorrek prozeduren araubide iragankorra jorratzen du; esan nahi baita, lege hau indarrean jarri aurretik indarrean zegoen araudia aplikatuko zaiela data horretan hasita zeuden prozedurei edo data hori baino lehenago aurretiazko ikerketa-jarduketak hasiak dituztenei.

Xedapen indargabetzaile bakarrak indarririk gabe uzten ditu 2/2004 Legea, otsailaren 25ekoa, Datu Pertsonaletarako Jabetza Publikoko Fitxategiei eta Datuak Babesteko Euskal Bulegoa sortzeari buruzkoa, lege hori garatzeko xedapenak eta lege honetan xedatutakoaren aurka doazen edo bertan jasotakoarekin bateraezinak diren edo kontraesanean dauden maila bereko edo apalagoko xedapen guztiak.

Azkenik, azken xedapena lege hau indarrean sartzeari buruzkoak da.

I. KAPITULUA

XEDAPEN OROKORRAK

1. artikulua.- Xedea.

1.- Lege honen xedea da Legearen aplikazio-eremuko subjektuen ardurapeko datu-tratamenduen kontrola eta gainbegiratzea arautzea.

2.- Era berean, lege honen xedea da Datuak Babesteko Euskal Agintaritzaren araubide juridikoa erregulatzea.

2. artikulua.- Aplikazio-eremua.

1.- Lege hau aplikatuko zaie arduradun gisa erakunde hauek dituzten datu pertsonalen tratamenduei:

- a) Euskal Autonomia Erkidegoko Administrazio Orokorra, lurralde historikoetako foru-administrazioak eta Euskal Autonomia Erkidegoko toki-administrazioak, bai eta haien mendeko administrazio instituzionalak eta haien dagokien sektore publikoa osatzen duten erakundeak ere.
- b) Euskal Sektore Publikoari buruzko maiatzaren 12ko 3/2022 Legearen 4. artikulua 3. eta 4. apartatuetan aurreikusitako sektore publikoa osatzen duten erakundeak.
- c) Eusko Legebiltzarra.
- d) Lurralde Historikoetako Batzar Nagusiak.
- e) Herri Kontuen Euskal Epaitegia.
- f) Arartekoa.
- g) Eusko Legebiltzarraren lege bidez sortutako entitateak eta administrazio-agintaritza independenteak.
- h) Eusko Legebiltzarreko legebiltzar-taldeak eta lurralde historikoetako eta toki-administrazioetako talde politikoak.
- i) Interes ekonomikoak eta lanbide-interesak ordezkatzeko zuzenbide publikoko korporazioak, haien lurralde-eremuak Euskal Autonomia Erkidegoa gainditzen ez badu, eta korporazio horien ordezkariak, baldin eta beren xedek betetzeko autonomia organiko, funtzional eta ekonomiko osoarekin jarduten badute eta haien lurralde-eremuak Euskal Autonomia Erkidegoa gainditzen ez badu.

- j) Euskal Herriko Unibertsitatea, Euskal Unibertsitate Sistema osatzen duten gainerako unibertsitateak eta unibertsitate horien mendeko erakundeak.
- k) Lan Harremanen Kontseilua eta Euskadiko Ekonomia eta Gizarte Arazoetarako Batzordea.
- l) Pertsona fisikoak edo juridikoak, baldin eta tratamendua egiten bada a) letran agertzen diren administrazio publikoen eskumeneko gaietako eginkizun publikoak egikaritzeko.
- m) Edozein eratako zuzeneko zein zeharkako kudeaketaren bidez zerbitzuak ematen dituzten zuzenbide pribatuko entitateak, tratamenduen xedea zerbitzu horiek ematearekin lotuta dagoenean.

2.- Era berean, lege honetan xedatuta dagoenaren mendean egongo dira tratamenduaren eragile gisa artikuluko honetako 1. apartatuan azaltzen diren arduradunei zerbitzuak ematen dizkieten pertsona fisikoak edo juridikoak, publikoak edo pribatuak.

3.- Lege hau ez zaie hauei aplikatuko:

- a) Hildakoen datuen tratamenduei, abenduaren 5eko 3/2018 Legearen 3. artikuluan eta maiatzaren 26ko 7/2021 Lege Organikoaren 3. artikuluan xedatutakoa gorabehera.
- b) Sailkatutako gaiak babesteari buruzko araudiaren mende dauden tratamenduei.

II. KAPITULUA

DATUAK BABESTEKO EUSKAL AGINTARITZA

1. atala

ANTOLAKETA ETA ARAUBIDE JURIDIKOA

3. artikulua.- Izaera eta araubide juridikoa.

1.- Datuak Babesteko Euskal Agintaritza administrazio-agintaritza independentea da, nortasun juridiko propioa eta gaitasun publiko eta pribatu erabatekoa izango ditu, eta administrazio publikoekiko inongo loturarik gabe beteko ditu bere eginkizunak.

Lehendakariak arloen dekretuan zehazten duen sailaren bidez jartzen da harremanetan Datuak Babesteko Euskal Agintaritza Eusko Jaurlaritzarekin.

2.- Datuak Babesteko Euskal Agintaritza kontrol-agintaritza independentea da 2016/679 (EB) Erregelamenduaren VI. kapituluan eta maiatzaren 26ko 7/2021 Lege Organikoaren VI. kapituluan xedatutakoaren ondorioetarako.

3.- Datuak Babesteko Euskal Agintaritzak gainbegiratze- eta kontrol-ahalak egikaritzean izapidetzen dituen prozedurak lege honen eta Legea garatzeko araudiaren mendean egongo dira, bai eta, subsidiarioki, Euskal Autonomia Erkidegoko administrazio publikoen zehatzeko ahalari buruzko araudian ezarrita dagoenaren mendean ere.

4.- Auzibidean jardun beharra badago, Eusko Jaurlaritzaren Zerbitzu Juridikoaren ardura izango da Datuak Babesteko Euskal Agintaritza ordezkatzeara eta defendatzeara, beren arauetan xedaturik dagoenaren arabera.

5.- Eusko Jaurlaritzari dagokio Datuak Babesteko Euskal Agintaritzaren Estatutua onartzea eta lege hau garatuko duten erregelamenduzko xedapen guztiak ematea.

4. artikulua.- Ekonomia- eta aurrekontu-araubidea.

1.- Datuak Babesteko Euskal Agintaritzak urtero prestatu eta onartuko du aurrekontu-aurreproiektua, eta Eusko Jaurlaritzara bidaliko du, Euskal Autonomia Erkidegoko Aurrekontu Orokorretan behar bezalako independentziarekin sar dadin, Euskadiko aurrekontu-araubidea erregulatzen duen legeriarekin bat etorriz. Legeria horren mendean egongo da, aurrekontua aldatzeko, gauzatzeko eta likidatzeko araubideari dagokionez, eta, ondorio horietarako, Agintaritzaren izaera hartuko da kontuan.

2.- Datuak Babesteko Euskal Agintaritzak ondasun eta baliabide hauek izango ditu bere helburuak betetzeko:

- a) Autonomia Erkidegoko Aurrekontu Orokorretan urtero izendatuko zaion diru-kopurua.
- b) Ematen dizkioten dirulaguntzak eta egiten dizkioten ekarpenak.
- c) Haren ondarea osatzen duten ondasun eta baloreak eta horietatik sortutako produktu eta errentak.
- d) Bere jarduera egikaritzearen ondoriozko diru-sarrerak (ohikoak eta apartekoak), 2016/679 (EB) Erregelamenduaren 58. artikuluan eta maiatzaren 26ko 7/2021 Lege Organikoaren 50. artikuluan ezarritako ahalak egikaritzearen ondoriozkoak barne.

e) Legez ematen dioten beste edozein ondasun edo baliabide.

3.- Datuak Babesteko Euskal Agintaritzaren diru-sarreraren emaitza positiboa Agintaritzaren erresebak hornitzeko baliatuko da, haren independentzia osoa bermatzeko.

4.- Datuak Babesteko Euskal Agintaritza Euskal Autonomia Erkidegoaren ekonomia, finantza eta kudeaketa arloko kontrolaren mendean egongo da, baita Herri Kontuen Euskal Epaitegiaren fiskalizazioaren mendean ere.

5. artikulua.- Langileen araubidea.

1.- Datuak Babesteko Euskal Agintaritzaren zerbitzuko langileak funtzionarioak izango dira, eta euskal funtzio publikoa erregulatzen duen legediaren agindupean egongo dira.

2.- Datuak Babesteko Euskal Agintaritzaren lanpostuen zerrenda Agintaritzaren lehendakariaren ebazpen bidez onartuko da eta Euskal Herriko Agintaritzaren Aldizkarian argitaratzen den egunean jarriko da indarrean.

3.- Datuak Babesteko Euskal Agintaritzari dagokio lanpostuak eskuratzeko sistema erabakitzea, baldintzak eta hautaprobeen ezaugarriak zehaztea, bai eta lanpostuak betetzeko eta laneko sustapeneko prozeduretako deialdiak egitea eta prozedura horiek kudeatzea eta ebaztea ere.

4.- Datuak Babesteko Euskal Agintaritzako langileek sekretupean gorde beharko dituzte beren eginkizunak betetzean ezagutzen dituzten informazioak, baita eginkizun horiek utzi ondoren ere.

6. artikulua.- Eginkizunak eta ahalak.

Datuak Babesteko Euskal Agintaritzak 2016/679 (EB) Erregelamenduaren 57. eta 58. artikuluetan eta maiatzaren 26ko 7/2021 Lege Organikoaren 49. eta 50. artikuluetan, hurrenez hurren, ezarritako eginkizunak eta ahalak egikaritu dituzte, bai eta lege honetan ezarritakoak ere.

Halaber, legez esleitzen zaizkion eskumenak egikaritu dituzte.

7. artikulua.- Gardentasuna.

1.- Gardentasunaren eta informazio publikorako irispidearen arloan aplikatu beharreko araudian ezarritako baldintzak betetzeaz gain, Datuak Babesteko Euskal Agintaritzak datuen babeserako xedapenen urraketarekin edo 2016/679 (EB) Erregelamenduaren 15.etik 22.era bitarteko artikuluetan ezarritako

eskubideen arretarekin zerikusia duten prozedurei amaiera ematen dieten lehendakariaren ebazpenak argitaratuko ditu bere web orrian, Agintaritzaren lehendakariak emanak, bai eta nazioarteko datu-transferentziak egitea xede duten klausula-ereduak onartzen dituztenak, datuen nazioarteko transferentziak baimentzen dituztenak edo ziurtapen-entitateak egiaztatzen dituztenak ere.

2.- Halaber argitaratuko dira web orrian datu-babeserako xedapenak urratzearekin edo maiatzaren 26ko 7/2021 Lege Organikoaren 21., 22. eta 23. artikuluetan ezarritako eskubideak betetzearekin zerikusia duten prozedurei amaiera ematen dieten Agintaritzaren lehendakariaren ebazpenak.

Aurreko paragrafoan azaltzen diren ebazpenak Datuak Babesteko Europako Lantaldearen irizpen batean ezarrita dagoenaren ondorioz ematen direnean, irizpen hori argitaratuko da emandako ebazpenarekin batera.

3.- Gainera, Datuak Babesteko Euskal Agintaritzak hauek ere argitaratuko ditu bere web orrian:

- a) Auditoretza-planak egin ondoren ezartzen diren gidalerro orokorrak.
- b) 2016/679 (EB) Erregelamenduaren 36. artikuluko 4. apartatuaren arabera ematen diren xedapen orokorrei buruzko nahitaezko txostenak.
- c) Planteatzen dizkieten kontsultei erantzuteko emandako irizpenak, baldin eta irizpen horiek aurretik argitaratu ez den datuen babeserako arauen interpretazio bat baldin badira.
- d) Agintaritzak onartutako jokabide-kodeak.
- e) Datu pertsonalak babesteko araudiari jarraituz argitaratu behar diren gainerako jarduketak.

4.- Aurreko apartatuetan azaltzen den informazioa zabaldu aurretik, datu pertsonalak disoziatu egingo dira, eta gardentasunaren eta informazio publikorako irispidearen arloan aplikatu beharreko legerian ezarritako mugak errespetatuko dira.

2. atala

DATUAK BABESTEKO EUSKAL AGINTARITZAREN ORGANOAK

8. artikulua.- Datuak Babesteko Euskal Agintaritzaren lehendakaria.

1.- Datuak Babesteko Euskal Agintaritzaren lehendakariak zuzentzen du Agintaritza, haren ordezkaria da eta haren ebazpenak, zirkularrak eta gidalerroak ematen ditu.

Hirugarrenengan ondorio juridikoak sortzen dituzten Euskal Agintaritzaren egintzak Lehendakariak emango ditu.

2.- Datuak Babesteko Euskal Agintaritzaren lehendakariak independentzia eta objektibotasun osoz beteko ditu bere zereginak, inolako jarraibiderik bete beharrik gabe.

3.- Datuak Babesteko Euskal Agintaritzaren lehendakaria Eusko Jaurlaritzaren dekretu bidez izendatuko da, bost urterako, eta kargua iraupen bereko epealdirako berritu ahalko da.

Jaurlaritzak Eusko Legebiltzarrari proposatuko dio Datuak Babesteko Euskal Agintaritzako lehendakari izateko egokitzat jotzen duen pertsona. Hautagai horrek dagozkion eginkizunak betetzeko eta ahalak egikaritzeko beharrezkoak diren titulazioa, esperientzia eta gaitasunak izango ditu, batez ere datu pertsonalen babesari buruzko alorrekoak.

4.- Proposamena jaso ondoren, Eusko Legebiltzarrak batzorde eskudunari aurkeztuko dio, gehiengo osoz onar dezan. Gehiengo osoa lortu ezean, proposamena indargabetuta geratuko da eta Eusko Jaurlaritzari itzuliko zaio.

5.- Datuak Babesteko Euskal Agintaritzaren lehendakariak arrazoi hauetako batengatik baino ezingo du kargua utzi agintaldia amaitu aurretik:

- a) Norberak hala eskatzeagatik.
- b) Dolozko delitu bat dela medio zigortua izateagatik.
- c) Bere betebeharrak larriki urratzeagatik.
- d) Bere eginkizunak gauzatzeko ezgaitasunagatik.
- e) Bateriaezintasunarengatik.

Apartatu honetako c), d) eta e) letretan aurreikusitako kasuetan Eusko Legebiltzarreko Erakunde, Segurtasun eta Gobernantza Publikoaren Batzordearen gehiengoak berretsi beharko ditu kargu-kentzeak.

6.- Datuak Babesteko Euskal Agintaritzaren lehendakaria goi-karguduna izango da, sailburuordearen parekoa, eta aurretik funtzio publikoren bat betetzen ari bazen, zerbitzu berezien egoeran geratuko da. Nolanahi ere, Kargu Publikodunen Jokabide Kodea eta Haien Interes Gatazkak Arautzen dituen ekainaren 26ko 1/2014 Legean eta hura garatzeko araudian xedatutakoa aplikatuko zaio.

7.- Datuak Babesteko Euskal Agintaritzaren lehendakariak emandako egintza eta xedapenek administrazio bidea amaitzen dute, eta horien aurka errekurtsioa aurkeztea dago administrazioarekiko auzien jurisdikzioan zuzenean.

8.- Datuak Babesteko Euskal Agintaritzaren lehendakariak, DBEOren 59. artikuluan xedatutakoaren arabera, bere jardueri buruzko txosten bat egingo du urtero, eta Eusko Legebiltzarrari, Eusko Jaurlaritzari eta datuak babesteko Estatuko gainerako agintaritzei jakinaraziko die. Txosten hori Agintaritzaren webgunean argitaratuko da.

9. artikulua.- Datuak Babesteko Euskal Agintaritzako Kontseilu Aholku-emailea.

1.- Datuak Babesteko Euskal Agintaritzaren lehendakariak kontseilu aholku-emaile baten laguntza izango du; hauek izango dira kontseilukide:

- a) Eusko Legebiltzarraren ordezkari bat, Legebiltzarrak berak izendatua.
- b) Euskal Autonomia Erkidegoko Administrazio Orokorraren ordezkari bat, Jaurlaritzak izendatua.
- c) Lurralde historiko bakoitzeko ordezkari bat, lurralde historiko horrek izendatua.
- d) Euskal Autonomia Erkidegoko toki-entitateen ordezkari bat, Euskadiko Udalen Elkarteak izendatua.
- e) Kontsumitzaileen eta erabiltzaileen ordezkari bat, «Kontsumobide» Kontsumoko Euskal Institutuak izendatua.
- f) Bi aditu —bata informazioaren teknologietakoa eta bestea zuzenbidearen arlokoa—, zuzenbidean eta datuen babesaren arloko jardunbidean ezagutza egiaztatuak dauzkatenak, Euskal Herriko Unibertsitateak izendatuak.

2.- Aholku Batzordearen osaeran emakumeen eta gizonen ordezkariak orekatu izateko ahalegina egingo da, trebakuntza, gaitasun eta prestakuntza egokiaz hornituak. Ondorio horietarako, ordezkariak orekatutzat joko da sexu biek % 40ko ordezkariak, gutxienez, dutenean.

3.- Datuak Babesteko Euskal Agintaritzaren lehendakariak erabakiko du Kontseilu Aholku-emailea noiz bilduko den; baina sei hiletik behin bildu beharko da, gutxienez.

4.- Kontseilu Aholku-emaileak hartutako erabakiak ez dira inoiz lotesleak izango.

5.- Artikulu honetan aurreikusita ez dagoen guztian, Datuak Babesteko Euskal Agintaritzaren Estatutuak ezarriko ditu Kontseilu Aholku-emailearen araubidea, antolaketa, eskumenak eta funtzionamendua.

3. atala

IKERTZEKO AHALA

10. artikulua.- Ikertzeko ahalaren eremua.

1.- Datuak Babesteko Euskal Agintaritzak, ikertzeko ahalak baliatuz, aldizkako edo unean uneko ikuskapenak egin ahalko ditu, ofizioz edo ukituek eskatuta, lege honen aplikazio-eremuaren barruan dauden tratamenduetako edozeinetan.

2.- Halaber, eginkizun horiek bete ahalko ditu auditoretza-plan bat egitean, lege honen 14. artikuluan ezarrita dagoenaren arabera.

11. artikulua.- Ikerketa-jarduerak egiteko eskumena duten langileak.

1.- Ikerketa-jarduera Datuak Babesteko Euskal Agintaritzako ikuskatzaileek egingo dute.

2.- Hala ere, Datuak Babesteko Euskal Agintaritzaren lehendakariak gaikuntza eman ahalko die beren-beregi beste funtzionario publiko batzuei, ikerketa-jarduerak egiteko. Gaikuntzak ematean, zehazki zein ikerketa-jardueratarako izango diren azalduko da.

3.- 2016/679 (EB) Erregelamenduaren 62. artikulua araberako ikerketa-jarduketa bateratuetan, Datuak Babesteko Euskal Agintaritzarekin elkarlanean diharduten Europar Batasuneko beste estatu kideetako kontrol-agintaritzetako langileek lege honetan ezarritakoari jarraikiz jardungo dute beren eginkizunak betetzen dituztenean. Langile horiek Datuak Babesteko Euskal Agintaritzako langileen aurrean jardungo dute, haien orientabide eta jarraibideen arabera.

4.- Ikerketa-jarduerak egiten dituzten funtzionarioak agintaritzaren agente izango dira, ondorio guztietarako, beren eginkizunak betetzen ari direnean.

12. artikulua.- Ikerketa-jardueraren norainokoa.

1.- Ikerketa-jarduera egiten dutenek beren eginkizunak betetzeko beharrezkoak diren informazioak eskatu ahalko dituzte. Zehazki:

- a) Informazio-sistemak dauden lokaletara edo datuen tratamenduak egiten diren lekuetara sartzea.

- b) Datu pertsonalak dauzkaten informazio-euskarriak aztertzea eta tratatu diren datuen kopia lortzea.
- c) Datu pertsonalak tratatzen dituzten informazio-sistemak aztertzea, dauden lekuan, baita tratamendua egiten den ekipo fisikoak eta logikoak ere.
- d) Beharrezkoak diren programa eta aplikazioak edo agiriak bidaltzeko eskatzea, egindako datuen tratamendua aztertzeko eta datu horien kopia lortzeko.
- e) Ikerketapeko tratamendua kudeatu eta sostengatzeko programak, aplikazioak edo prozedurak exekuta daitezela eskatzea.
- f) Datuen tratamendua bideratu ahal duten informazio-sistemen, gailuen, ekipoen edo programen auditoretzak egitea, indarreko legeriarekin bat datozen ala ez erabakitzeko.
- g) Ikuskapen-eginkizunak egiteko beharrezkoak diren beste informazio guztiak erakusteko edo bidaltzeko eskatzea.
- h) Tratamenduei buruz hartutako neurri teknikoak eta antolakuntzakoak berraztertzea.

2.- Ikerketa-jardueretan dihardutenak ikuskatuaren etxebizitzan sartzea beharrezkoa denean, eta Konstituzioak etxebizitza babesten duenez, haren adostasuna edo dagokion baimen judiziala eskuratu beharko da, etxebizitzaren bortxaezintasuna errespetatuta.

13. artikulua.- Lankidetzan jarduteko betebeharra.

1.- Administrazio publikoek, foru-ogasunak barne direla, bai eta pertsona fisikoek edo juridikoek ere, haien tratamenduak lege honetan xedatutakoaren mendean egon zein ez, nahitaez eman beharko dizkiote Datuak Babesteko Euskal Agintaritzari bere ikerketa-jarduera egoki egiteko behar dituen datuak, txostenak, aurrekariak eta egiaztagirak Informazioak datu pertsonalak dituenean, datu horien komunikazioa 2016/679 (EB) Erregelamenduaren 6.1 c) artikuluan xedatutakoaren babesean egingo da.

2.- Datuak Babesteko Euskal Agintaritzak, bere eskumenen esparruan, abenduaren 5eko 3/2018 Lege Organikoaren 52. artikuluko 2. eta 3. apartatuetan xedatutako ahalmenak izango ditu.

14. artikulua.- Auditoretza-planak.



1.- Datuak Babesteko Euskal Agintaritzaren lehendakariak auditoretza-planak egitea erabaki ahalko du, dela lege honen aplikazio-eremuaren barruan dauden tratamendu-arduradun edo -eragileen esparru jakin bati buruz, dela mota jakin bateko tratamendu-jarduera bati buruz.

2.- Prebentziosko auditoretza-planen xedea da 2016/679 (EB) Erregelamenduaren xedapenak eta datu pertsonalen babesaren arloan aplikatu beharreko gainerako araudia betetzen diren aztertzea.

3.- Auditoretza-planen ondorioz, Datuak Babesteko Euskal Agintaritzaren lehendakariak datuen babeserako arauak erabat betetzeko beharrezkoak diren gidalerroak eman ahalko ditu. Gidalerro horiek ikuskapenaren mendean egon diren subjektu guztiei edo tratamendu baten arduradun edo eragile jakin batzuei zuzendu ahalko zaizkie.

Gidalerroak nahitaez bete beharko dira beti.

4. atala

ARAUTZEKO AHALA

15. artikulua.- Datuak Babesteko Euskal Agintaritzaren zirkularrak.

1.- Datuak Babesteko Euskal Agintaritzaren lehendakariak lege hau eta legea bera garatzeko araudia interpretatzeko jarraibideak onartuko ditu, bai eta, hala badagokio, datu pertsonalak babesteari buruz aplikagarria den gainerako araudia interpretako jarraibideak ere.

2.- Lege honen mendean dauden tratamenduei buruzko zirkularrak eman ahalko ditu, 2016/679 (EB) Erregelamenduan eta datu pertsonalen babeserako gainerako araudian ezarritakoa aplikatzen duenean, bere jardunbidearen irizpideak finkatzeko.

3.- Zirkularrak egiteko, beharrezkoak diren txosten tekniko eta juridikoak eskatuko dira eta interesdunei entzunaldia bermatuko zaie beti, zirkularra prestatzen ari den bitartean, beharrezkoa izanez gero.

4.- Zirkularrak derrigorrezkoak izango dira lege honen mendean dauden subjektuentzat, Euskal Herriko Agintaritzaren Aldizkarian argitaratu ostean.

5. atala

DATUAK BABESTEKO EUSKAL AGINTARITZAREN BESTE ESKUMEN BATZUK.

16. artikulua.- Kanpo harremanak.

1.- Datuak Babesteko Euskal Agintaritzak, bere eskumenen barruan, Euskal Autonomia Erkidegoari kanpo-harremanen subjektu gisa Estatuaren kanpo ekintzari buruzko araudiaren arabera dagozkion eginkizunak bete ahalko ditu.

2.- Datuak Babesteko Euskal Agintaritzak, Euskal Autonomia Erkidegoaren ordezkari gisa, nazioarteko administrazio-hitzarmenak egin ahalko ditu nazioarteko itunak gauzatzeari eta zehazteari begira, itunek aukera hori aurreikusten dutenean, horretarako gaitasuna ematen dietenean, eta haien eskumeneko gaien ingurukoa denean, lege honetan xedatuta dagoenaren arabera.

3.- Halaber, arauemaileak ez diren eta sinatzaileak juridikoki lotzen ez dituzten hitzarmenak egin ahal izango ditu Datuak Babesteko Euskal Agintaritzak nazioarteko zuzenbideko beste subjektu batzuen erakunde baliokideekin, euren eskumeneko gaien inguruan.

17. artikulua.- Datuen nazioarteko transferentziak.

1.- Datuak Babesteko Euskal Agintaritzak kontratuetarako klausula-ereduak sinatu ahalko ditu, bere eskumeneko tratamendu-arduradunek eta -eragileek nazioarteko datu-transferentziak egin ditzaten, 2016/679 (EB) Erregelamenduaren 46.2.c) artikuluekin bat.

2.- Halaber, korporazio-arau lotesleak onartu ahalko ditu 2016/679 (EB) Erregelamenduaren 47. artikuluan ezarrita dagoenaren arabera.

3.- Datuak Babesteko Euskal Agintaritzak baimena emango du beste herrialde edo nazioarteko erakunde batera nazioarteko datu-transferentziak egiteko, nahiz eta Lantaldeak egoki iritzi ez edo aurreko apartatuetan xedatutako bermeren baten babespean ez egon. Baimena emango du kasu hauetan:

- a) Transferentziaren oinarrian dauden bermeak egokiak direnean kontratu-klausulei dagokienez, nahiz eta ez izan 2016/679 (EB) Erregelamenduaren 46.2 artikuluen c) eta d) letretan ezarritako klausula-ereduen arabekoak.
- b) Transferentzia zuzenbide publikoko subjektu batek egiten duenean eta transferentziaren oinarria denean hirugarren estatuetakoa agintaritzak edo organismo publikoekin egindako nazioarteko akordio ez-arauemaileetan xedatutakoa, zeinek ukituentzako eskubide efektiboak eta exijitu daitezkeenak jasoko baitituzte, bai eta elkar ulertzeko memorandumak ere.

4.- Datuak Babesteko Euskal Agintaritzaren ebazpena Datuak Babesteko Europako Lantaldearen irizpean jarri beharko da, 2016/679 (EB) Erregelamenduaren 64. artikuluan xedatuta dagoenaren arabera.

5.- Artikulu honen 2. eta 3. apartatuetan ezartzen diren kasuetan, Datuak Babesteko Europako Lantaldeari irizpena eskatzeak berekin ekarriko du eskatutako nazioarteko transferentzia bidezkoa den ala ez ebazteko prozedura etetea, Datuak Babesteko Euskal Agintaritzari irizpena jakinarazi arte.

6.- Datuak Babesteko Euskal Agintaritzak abenduaren 5eko 3/2018 Lege Organikoaren laugarren xedapen gehigarrian azaltzen den baimen judiziala eskatu ahalko dio Euskal Autonomia Erkidegoko Justizia Auzitegi Nagusiaren Administrazioarekiko Auzien Salari.

7.- Arau-hauste penalak prebenitzeko, detektatzeko, ikertzeko eta epaitzeko eta zehapen penalak betearazteko nazioarteko datu-transferentziak maiatzaren 26ko 7/2021 Lege Organikoaren V. kapituluan xedatutakoaren arabera erregulatuko dira.

8.- Tratamenduaren arduradunek Datuak Babesteko Euskal Agintaritzari eman beharko diote egin nahi duten edozein nazioarteko transferentziaren berri, baldin eta transferentzia oinarritzen bada arduradunek bilatzen dituzten premiazko interes legitimoekin loturiko helburuak lortzeko beharrezkotasunean eta 2016/679 (EB) Erregelamenduaren 49.1 artikuluko azken paragrafoan aurreikusitako beste baldintza guztiak betetzen badira. Era berean, transferentziaren berri eta bilatzen dituzten premiazko interes legitimoen berri emango diete ukituei.

18. artikulua.- Jokabide-kodeak.

1.- Datuak Babesteko Euskal Agintaritzak lege honen aplikazio-esparruaren mende dauden subjektuen tratamendu-jarduerak arautzeko jokabide-kodeak sustatu eta onartuko ditu. Era berean, jokabide-kodeak ikuskatu behar dituzten erakundeak onesteko irizpideak landu eta argitaratu ahalko ditu.

2.- Datuak Babesteko Euskal Agintaritzak 2016/679 (EB) Erregelamenduaren 63. artikuluan jasotako koherentzia-mekanismoaren mende jarri beharko ditu jokabide-kodeen proiektuak, Erregelamenduaren 40.7 artikulua agintzen duen kasuetan. Kodea onartzeko prozedura etenda geldituko da Datuak Babesteko Europako Lantaldeak Erregelamenduaren 64.1.b) eta 65.1.c) artikuluetan jasotzen den irizpena ematen ez duen bitartean.

3.- Datuak Babesteko Euskal Agintaritzak berak onartutako jokabide-kodeen erregistroa izango du. Bitarteko elektronikoen bidez eskuratu ahalko den erregistro hori lotuta egongo da datuak babesteko Estatuko gainerako agintaritzen erregistroekin. Halaber, erregistro hori Datuak Babesteko Europako Lantaldeak kudeatzen duen erregistroarekin koordinatuko da 2016/679 (EB) Erregelamenduaren 40.11 artikulua arabera.

4.- Erregistroaren edukia eta onartzeko prozeduraren berezitasunak dekretu bidez ezarriko dira.

19. artikulua.- Ziurtagiriak.

1.- Datuak Babesteko Euskal Agintaritzak ziurtagiriak eman ahal izango ditu, ziurtatzeko irizpideak onartu, eta datuen babesaren arloko organismo edo entitateak egiaztatu ahaliko ditu, lege honen 2. artikuluan azaltzen diren arduradun eta eragileek egindako tratamendu-jarduerei dagokienez, Datuak Babesteko Erregelamendu Orokorren 42. eta 43. artikuluetan xedatutakoaren arabera.

2.- Aurreko hori galarazi gabe, Egiaztatze Erakunde Nazionalak (ENAC) ziurtapen-entitateei onespenez eman, kendu edo berriki dituela jakinarazi beharko dio Datuak Babesteko Euskal Agintaritzari, eta horretarako erabili duen arrazoia azaldu ere bai.

20. artikulua.- Datu pertsonalak babesteari buruzko prestakuntza.

1.- Datuak Babesteko Euskal Agintaritzak datu pertsonalak babesteko araudian jasotzen diren xedapenak heda daitezela bultzatuko du, herritarrek behar bezala jakin dezaten datu pertsonalen babeserako oinarrizko eskubidea daukatela, eta arduradunek jakin dezaten arau horiek betebeharrak batzuk ezartzen dizkietela eskubide hori errespetatzeko.

2.- Xede horrekin, akordioak eta hitzarmenak egingo ditu Euskal Herriko Unibertsitatearekin eta Euskal Unibertsitate Sistema osatzen duten gainerako unibertsitate eta entitateekin, bai eta tratamenduen arduradunak, profesionalak eta kontsumitzaileak ordezkatzeko dituzten korporazio eta elkarteekin ere.

6. atala

LANKIDETZA DATUAK BABESTEKO BESTE AGINTARITZA BATZUEKIN

21. artikulua.- Lankidetzaren instituzionalaren printzipioa.

1.- Datuak Babesteko Euskal Agintaritzak bermatzen du datuak babesteko Estatuko gainerako agintaritzekin lankidetzan aritzeko, elkarlana egiteko eta koordinatzeko printzipioak beteko dituela, datuak babesteko oinarrizko eskubidea behar bezala babesten dela ziurtatze aldera, eta betiere leialtasun instituzionalaren printzipioari jarraikiz.

2.- Xede horrekin, Datuak Babesteko Euskal Agintaritzak:

- a) Daukan informazioa gainerako agintaritzen esku jarriko du, haiek eskatzen diotenean, baldin eta informazio hori agintaritza horientzat beharrezkoa bada euren eskumenak egikaritzeko.
- b) Euskal Autonomia Erkidegoaren eremuan, datuak babesteko Estatuko gainerako agintaritzei laguntza emango die, euren eskumenak egikaritzeko beharrezkoa badute.
- c) Auditoretzako eta ikerketako jarduera bateratuak egingo ditu, hala erabakitzen denean.
- d) Denon intereseko gai espezifikoak aztertzeke eraten diren lantaldeetan parte hartuko du.

3.- Artikulu honetan araututa dagoen erakunde arteko lankidetzak behar bezala garatzeko beharrezkoak diren protokolo, akordio eta hitzarmenak sinatu ahalko ditu Datuak Babesteko Euskal Agintaritzak datuak babesteko Estatuko gainerako agintaritzekin.

22. artikulua.- Auditoretza-plan bateratuak.

1.- Datuak Babesteko Euskal Agintaritzak auditoria-ekintza bateratuak egin ahal izango ditu Estatuko datuak babesteko gainerako agintaritzekin.

2.- Horren haritik, agintaritza bateko eta besteko langileek parte hartu ahalko dute egiten diren ikerketa-jarduketara bateratuetan. Kasu horietan, lege honen II. kapituluko 3. atalaren arabera Datuak Babesteko Euskal Agintaritzan ikerketa-jarduera egiteko eskumena duten langileek gainerako esku-hartzaileen jarduera koordinatuko dute, esku-hartzaile horiek lege honen mendeko tratamendu-arduradunak edo -eragileak direnean, zeinek Datuak Babesteko Euskal Agintaritzako langileen zuzendaritzapean eta koordinaziopean jardungo baitute.

3.- Auditoretza-planen ondorioz, lege honen mendean dauden subjektuen gainean egokiak diren gidalerroak eman ahalko ditu Datuak Babesteko Euskal Agintaritzak, ezertan ere galarazi gabe esku hartzen duten agintaritza guztiek batera ezartzen dituzten gidalerroak.

23. artikulua.- Lankidetzak mugaz gaindiko prozeduren esparruan.

1.- Datuak Babesteko Euskal Agintaritzak agintaritza nagusitzat edo interesduntzat hartu ahal izango da mugaz gaindiko prozeduretan, 2016/679 (EB) Erregelamenduaren 56. eta 60. artikuluetan ezarritakoaren arabera.

2.- Datuak Babesteko Euskal Agintaritzak datu pertsonalen mugaz gaindiko tratamendu batekin lotutako prozedura koordinatu batean esku hartzen badu edo

Agintaritzaren erabakietako bat Datuak Babesteko Europako Lantaldeak onartu behar badu, Datuak Babesteko Euskal Agintaritzak Datuak Babesteko Europako Lantaldearen bileretan esku hartuko du, abenduaren 5eko 3/2018 Legearen 60., 61. eta 62. artikuluetan ezarrita dagoenaren arabera.

3.- Europar Batasuneko estatu kideetako datuak babesteko agintaritzen arteko laguntza eta lankidetzat, maiatzaren 26ko 7/2021 Lege Organikoaren esparruan, lege horren 51. artikuluan xedatutakoaren mende egongo da.

III. KAPITULUA

ZEHAPEN-ARAUBIDEA

DATUAK BABESTEKO EUSKAL AGINTARITZAREN AHAL ZUZENTZAILEA

24. artikulua. Subjektu erantzuleak.

1.- Lege honen 2. artikuluan azaltzen diren tratamenduen arduradunak eta eragileak kapitulu honetan jasota dagoen arau-hausteen eta zehapenen araubidearen mendean egongo dira.

2.- Lege honen zehapen-araubidea hauei ere aplikatuko zaie:

- a) Datuak Babesteko Euskal Agintaritzak onartutako jokabide-kodeak gainbegiratzeko onspena duten entitateei, 18. artikuluari jarraikiz.
- b) Datuak Babesteko Euskal Agintaritzak egiaztatutako ziurtapen-entitateei, 19. artikuluari jarraikiz.

25. artikulua.- Arau-haustek.

1.- Lege honen arau-haustek dira 2016/679 (EB) Erregelamenduaren 83. artikuluko 4., 5. eta 6. apartatuetan eta abenduaren 5eko 3/2018 Lege Organikoaren 72.etik 74. artikuluetara bitartean aipatzen diren egintza eta jokabideak.

2.- Halaber, arau-haustek dira maiatzaren 26ko 7/2021 Lege Organikoaren 58.etik 60. artikuluetara bitartean aipatzen diren egintza eta jokabideak.

3.- Datuak Babesteko Euskal Agintaritzak eskumena izango du aurreko artikuluan aipatzen diren subjektu erantzuleek egindako arau-haustek zehatzeko, 7/2021 Lege Organikoaren 58.j) eta 59.j) artikuluetan tipifikatutako jokabideak izan ezik.

26 artikulua. Arau-haustek preskribatzea.

1.- 2016/679 (EB) Erregelamenduaren 83. artikuluko 4., 5. eta 6. apartatuetan aipatzen diren arau-hausteeak hiru urteren buruan, bi urteren buruan edo urtebetearen buruan preskribatuko dute, haien sailkapenaren arabera —oso astunak, astunak edo arinak, hurrenez hurren—, abenduaren 5eko 3/2018 Lege Organikoaren 72. artikulutik 74. artikulura arteko jarraituz.

2.- Maiatzaren 26ko 7/2021 Lege Organikoan tipifikatutako arau-hausteeak sei hilabete buruan, bi urteren buruan edo hiru urteren buruan preskribatuko dute, haien sailkapenaren arabera —arinak, astunak edo oso astunak, hurrenez hurren—.

3.- Arau-haustearen preskripzioa eten egingo da, interesduna jakitun dela, lege honen IV. kapituluaren ezarritako prozedura hasten denean. Preskripzio-epea berriro hasiko da zenbatzen baldin eta zehapen-prozedura sei hilabetetik gora gelditu badago ustezko arau-hausteari egotzi ezin zaion arrazoi baten ondorioz..

27. artikulua.- Administrazio-zehapenak eta neurri zuzentzaileak.

1.- Artikulu honetan jasota dagoen araubidea entitate hauei aplikatuko zaie:

- a) Izaera juridiko pribatua duten Euskal Autonomia Erkidegoko sektore publikoko erakundeei.
- b) Edozein eratako zuzeneko zein zeharkako kudeaketaren bidez zerbitzu publikoak ematen dituzten pertsona fisikoei eta entitate pribatuei edo lege honen mende dauden tratamendu-eragile direnei, Legearen 2.2 artikuluan arabera.
- c) Jokabide-kodeak gainbegiratzeko egiaztatuta dauden entitateei eta Datuak Babesteko Euskal Agintaritzak egiaztatutako ziurtapen-entitateei, baldin eta entitate horiek izaera juridiko pribatua badute.

2.- Lege honen 25. artikuluan azaltzen diren arau-hausteeak isunen bidez zehatuko dira, 2016/679 (EB) Erregelamenduaren 83. artikuluko 4., 5. eta 6. apartatuetan eta maiatzaren 26ko 7/2021 Lege Organikoaren 62.2 artikuluan xedatutakoaren arabera.

Isunen diru-zenbatekoa zehazteko, 2016/679 (EB) Erregelamenduaren 83.2 artikuluan eta abenduaren 5eko 3/2018 Lege Organikoaren 76.2 artikuluan ezartzen diren irizpideei jarraituko zaie.

3.- Kasuan kasuko inguruabarrak hartuko dira kontuan isunak jartzeko, 2016/679 (EB) Erregelamenduaren 58.2 artikuluko a) letratik h) letrara artean eta j) letran jasotzen diren neurrien osagarri edo ordezkoko gisa.

28. artikulua.- Euskal Autonomia Erkidegoko administrazioei, entitateei eta instituzio publikoei aplikatu beharreko araubidea.

1.- Lege honen aplikazio-eremuaren barruan dauden Euskal Autonomia Erkidegoko administrazioei, entitateei eta instituzio publikoei, tratamenduaren arduradun edo eragile gisa jardutean, Legean azaltzen diren arau-hausteetako bat egiten badute, ohartarazpen bidez ezarriko zaie zehapena. Ebazpenak, gainera, jokabide arau-hauslea eteteko edo arau-haustearen ondorioak zuzentzeko hartu beharreko neurriak ezarriko ditu.

2.- Ebazpena tratamenduaren arduradunari edo eragileari jakinaraziko zaio, baita hierarkian gainetik duen organoari —halakorik baldin badago— eta salatzaileari ere.

3.- Interesdun ez den salatzaileak prozeduran parte hartzeko modu bakarra izango du; alegia, prozedura ireki den ala ez jakiteko eskubidea izatea eta, halakorik badago, prozedura amaitzeko ebazpenaren berri izatea.

4.- Aurreko apartatuan xedatutakoa ezertan ere eragotzi gabe, Datuak Babesteko Euskal Agintaritzak diziplinako jarduketak abiaraztea proposatuko du, horretarako zantzuak badaude. Kasu horretan, aplikatzekoa den diziplina- edo zehapen-araubideari buruzko legerian ezarritako prozedura eta zehapenak erabiliko dira.

5.- Gainera, arau-haustea agintariei, goi-kargudunei eta zuzendariei egoztekoak direnean, eta egiaztatzen bada badela tratamenduari begira egindako txosten tekniko edo gomendiorik eta ez zaiela behar bezala jaramon egin, arduradun den karguaren izena daraman ohartarazpen bat sartuko da ebazpenean, eta Euskal Herriko Agintaritzaren Aldizkarian argitaratzeko aginduko da.

6.- Agintaria, goi-karguduna edo zuzendaria Euskal Autonomia Erkidegoko Administrazio Orokor eta Instituzionaleko kargu publikodunen eta behin-behineko langileen Etika eta Jokabide Kodearen mendean badago, ebazpena Etika Publikoko Batzordeari ere bidaliko zaio, hark dagokion izapidea eman diezaion eta, bereziki, kode etiko horretan ezarritako erantzukizun-printzipioa betetzen dela bermatzeko.

7.- Aurreko bi apartatuetan aipatzen diren neurri eta jarduketak direla-eta ematen diren ebazpenak datuak babesteko agintaritzari komunikatu beharko zaizkio.

8.- Artikulu honen babespean emandako zehapen-ebazpenak Arartekoari komunikatuko zaizkio.

29. artikulua.- Zehapenak argitaratzea.

Lege honen 7. artikuluan ezarritako gardentasun-betebeharrak ezertan ere galarazi gabe, Datuak Babesteko Euskal Agintaritzak hauek argitaratuko ditu Euskal Herriko Agintaritzaren Aldizkarian:

- a) Arau-hauslea identifikatzen duen informazioa, egindako arau-haustea eta ezarritako zehapenaren diru-zenbatekoa, baldin eta zehapena milioi bat eurotik gorakoa bada eta arau-hauslea pertsona juridikoa bada.
- b) Lege honen 28.5. artikuluko bigarren paragrafoan azaltzen diren ohartarazpenak.

30. artikulua.- Zehapenek preskribatzea.

1.- 2016/679 (EB) Erregelamendua eta lege hau aplikatzearen ondorioz ezartzen diren zehapen ekonomikoek epe hauetan preskribatuko dute:

- a) 40.000 euroko edo hortik beheragoko zehapenek urte baten buruan preskribatuko dute.
- b) 40.001 eta 300.000 euro arteko zehapenek bi urteren buruan preskribatuko dute.
- c) 300.000 eurotik gorako zehapenek hiru urteren buruan preskribatuko dute.

2.- Maiatzaren 26ko 7/2021 Lege Organikoa aplikatzearen ondorioz ezartzen diren zehapen ekonomikoek epe hauetan preskribatuko dute:

- a) 6.000 eta 60.000 euro arteko zehapenek urte baten buruan preskribatuko dute.
- b) 60.001 eta 360.000 euro arteko zehapenek bi urteko epean preskribatuko dute.
- c) 360.001 eta 1.000.000 euro arteko zehapenek hiru urteko epean preskribatuko dute.

3.- Zehapenen preskripzio-epetaren zenbaketa hasiko da zehapena ezartzen duen ebazpena betearazi ahal den egunaren edo ebazpenaren aurkako errekurtsua aurkezteko epea amaitzen den egunaren biharamunetik.

4.- Arau-haustearen preskripzioa eten egingo da, interesduna jakitun dela, lege honen IV. kapituluaren ezarritako prozedura hasten denean. Preskripzio-epea berriro hasiko da zenbatzen baldin eta zehapen-prozedura sei hilabetetik gora gelditu bada ustezko arau-hausleari egotzi ezin zaion arrazoi baten ondorioz..

IV. KAPITULUA

DATUAK BABESTEKO ARAUDIA URRATUZ GERO ERABILI BEHARREKO PROZEDURAK

1. atala

XEDAPEN OROKORRAK

31. artikulua.- Araubide juridikoa.

1.- Kapitulu honetako xedapenak Datuak Babesteko Euskal Agintaritzak izapideturiko prozedura hauetan aplikatuko dira:

- a) Ukitutako pertsona batek erreklamatzeko badu ez diotela jaramonik egin 2016/679 (EB) Erregelamenduaren 15.etik 22. artikulura artekoetan eta maiatzaren 26ko 7/2021 Lege Organikoaren 21.etik 23.era artekoetan jasotako eskubideak egikaritzeko egin duen eskabideari.
- b) Ikertzen bada datuen babesaren arloan arau-hausterik egin den ala ez.
- c) Mugaz gaindiko prozedura batean Datuak Babesteko Euskal Agintaritzak agintaritzak nagusia bada, 2016/679 (EB) Erregelamenduan xedatuta dagoenaren arabera.

2.- Prozedura horiek, aplikatzekoa den heinean, 2016/679 (EU) Erregelamenduaren mendean egongo dira, bai eta kapitulu honetan eta lege hau garatzeko xedapenetan xedatutakoaren mendean ere.

3.- Zehapen-prozedurei subsidiarioki aplikatuko zaie Euskal Autonomia Erkidegoko administrazio publikoen zehatzeko ahalari buruzko araudian ezarrita dagoena.

32. artikulua.- Prozedura eteteko arrazoiak.

1.- Kapitulu honetan ezarritako izapidetze-epeak eten egingo dira automatikoki baldin eta, 2016/679 (EB) Erregelamenduak agindutakoaren arabera, informazioa, kontsulta, laguntza edo aginduzko irizpena eskatu behar bazaio Europar Batasuneko organo edo organismoren bati edo beste estatu kide batzuetako kontrol-agintaritzaren bati edo gehiagori, eta etendurak iraungo du eskaera egiten denetik Datuak Babesteko Euskal Agintaritzari erabakia jakinarazten zaion arte. Eten hori interesdunari jakinaraziko zaio.

2.- Izapideak egiteko epeak etenda geratuko dira, halaber, administrazio-prozedura arautzen duen oinarritzko legerian eta legeria autonomikoan ezarritako kasuetan.

3.- Bereziki, epeak etenda geratuko dira mugaz gaindiko tratamenduekin lotutako prozeduretan kontrol-agintaritza nagusia zehaztu behar denean eta 2016/679 (EB) Erregelamenduaren 60. eta 63. artikuluetan ezarritako prozedura koordinatua izapidetu behar denean ere.

2. atala

PROZEDURAREN HASIERA

33. artikulua.- Erreklamatzuz gero egin beharreko izapideak. Izapidetzeko onartu aurretik egin beharrekoak.

1.- Datuak Babesteko Euskal Agintaritzari erreklamazio bat egiten zaionean 2016/679 (EB) Erregelamenduaren 57.1 f) artikuluan edo maiatzaren 26ko 7/2021 Lege Organikoaren 52. artikuluan ezarrita dagoenaren arabera, Agintaritzak, beste ezer egin aurretik, eskumena duen ala ez aztertuko du eta erreklamazioaren xede den tratamendua mugaz gaindikoa den ala ez zehaztuko du, erregelamendu horretan xedatuta dagoenaren argitan.

2.- Datuak Babesteko Euskal Agintaritzak, ikusten badu eskumena datuak babesteko Estatuko beste agintaritza bati dagokiola edo, mugaz gaindiko prozedura baten kasuan, 2016/679 (EB) Erregelamenduaren arabera agintaritza nagusia den Europar Batasuneko beste estatu kide bateko kontrol-agintaritza bati dagokiola, erreklamazioaren berri emango dio berehala eskumena duenari. Erreklamazioaren helarazpena eta behin-behineko artxibatzea erreklamaziogileari jakinaraziko zaizkio.

3.- Datuak Babesteko Euskal Agintaritzaren eskumena egiaztatu ondoren, agintaritza horrek erreklamazioaren berri eman ahalko dio erreklamazioa zuzentzen zaion tratamendu-arduradun edo -eragileari, gehienez hilabeteko epean beharrezkotzat jotzen dituen azalpen eta alegazioak egin ditzan aurkeztutako erreklamazioari buruz. Arduradunak edo eragileak Datuak Babesteko Euskal Agintaritzari jakinarazten dionean datuak babesteko ordezkari bat izendatu duela, erreklamazioaren berri ordezkari horrek emango du.

Hilabeteko epea igaro eta erreklamazioari emandako erantzuna ez bazaio jakinarazi Datuak Babesteko Euskal Agintaritzari, agintaritza horrek aurrera jarraituko du prozedurarekin.

4.- Era berean, tratamenduaren arduraduna edo eragilea jokabide-kode baten mendean badago, Datuak Babesteko Euskal Agintaritzak erreklamazioaren berri eman ahalko dio bere gainbegiratze-organoari, hark hilabeteko epean txostena egin dezan.

34. artikulua.- Erreklamazioak izapidetzeko onartzea.

1.- Datuak Babesteko Euskal Agintaritzak, erreklamazioa jaso eta hurrengo hiru hilabeteen barruan, izapidetzeko onartzeko edo ez onartzeko ebazpena emango du.

2.- Datuak Babesteko Euskal Agintaritzak, izapidetzeko onartzeari buruzko erabakian, erreklamazioa zein motatako prozedurak sorrarazi duen azalduko du.

3.- Datuak Babesteko Euskal Agintaritzari erreklamazio bat aurkezten bazaio 2016/679 (EB) Erregelamenduaren 15.etik 22. artikulura artekoetan edo maiatzaren 26ko 7/2021 Lege Organikoaren 21.etik 23.era artekoetan jasotako eskubideei epe barruan jaramonik egin ez zaielako eta datuak babesteko araudiaren arau-hauste izan daitezkeen gertakariak egon direlako, Datuak Babesteko Euskal Agintaritzak bi prozedura bereizi izapidetzeko onartu ahalko ditu; prozedura horiek kapitulu honetako 3. eta 4. ataletan, hurrenez hurren, ezarrita dagoenaren arabera izapidetuko dira.

4.- Erreklamazioa jasotzen denetik hiru hilabete igarotzen badira erreklamaziogileari izapidetzeko onartzeari buruzko erabakia jakinarazi gabe, egun horretatik aurrera erreklamazioa onartutzat joko da, eta izapidetzen jarraituko da kapitulu honetako 3. eta 4. ataletan ezarritako prozeduren arabera.

35. artikulua.- Izapideak ez onartzea.

1.- Datuak Babesteko Euskal Agintaritzak erreklamazioa izapidetzeko ez onartzea erabakiko du baldin eta datu pertsonalen babesaren arloko gaiei buruzkoa ez bada, modu nabarian oinarririk ez badu, abusuzkoa bada edo arau-hausteen arrazoizko zantzurik ez dakarrenean.

2.- Halaber, Datuak Babesteko Euskal Agintaritzak erreklamazioa izapidetzeko ez onartzea erabaki ahalko du baldin eta tratamenduaren arduradunak edo eragileak, Agintaritzak aldeztatik ohartarazita, neurri zuzentzaileak hartu baditu datu-babeserako legeriaren urraketa posiblearen aurka egiteko eta inguruabar hauetakoren bat gertatzen bada:

- a) Ukituari kalterik sortu ez izana, preskripzioari dagokionez arintzat jotzen diren arau-hausteen kasuan; edo
- b) Hartutako neurriak aplikatuz ukituaren eskubideak erabat bermatuta geratzea.

36. artikulua.- Prozedura hasteko beste arrazoi batzuk.

Datuak Babesteko Euskal Agintaritzak kasu hauetan ere erabaki ahalko du prozedura hastea:

- a) Europar Batasuneko beste estatu kide bateko kontrol-agintaritza batek Datuak Babesteko Euskal Agintaritzari komunikatzen badio erreklamazio bat aurkeztu dutela beste kontrol-agintaritza horretan eta Datuak Babesteko Euskal Agintaritza kontrol-agintaritza nagusia bada prozedura izapidetzeko 2016/679 (EB) Erregelamenduaren 56. eta 60. artikuluen arabera.
- b) Datuak babesteko Estatuko beste agintaritza batek berari aurkeztu dioten erreklamazioa igortzen badio eta Datuak Babesteko Euskal Agintaritza bada erreklamazio hori aztertzeke eskuduna, lege honen 2. artikuluaaren arabera.
- c) Datuak Babesteko Euskal Agintaritzak hala erabakitzen badu, datu pertsonalak babesteko araudian xedatutakoaren urraketa baten zantzuak daudela jakin ondoren.

3. atala

ESKUBIDEAK BALIATZEAREN ONDORIOZKO ERREKLAMAZIOEN KASUAN JARRAITU BEHARREKO PROZEDURA

37. artikulua.- Prozedura izapidetzea.

1.- Erreklamazioa izapidetzeko onartu ondoren edo onartzeko epea igaro ondoren, Datuak Babesteko Euskal Agintaritzak erreklamazioa igorriko dio tratamenduaren arduradunari, hark hamabost eguneko epean beharrezkotzat jotzen dituen alegazioak egin ditzan.

2.- Alegazio horiek jasotzen dituenean edo aurreko apartatuan ezarritako epea amaitzen denean, Datuak Babesteko Euskal Agintaritzak egin beharreko txostenak, probak eta instrukzio-egintzak egingo ditu, baita tartean denari eta atzera berriro tratamenduaren arduradunari entzunaldia eman ere, eta erreklamazioa ebatzi beharko du.

3.- Sei hilekoa izango da prozedura ebazteko gehieneko epea, izapidetzeko onartzeko erabakia erreklamatzaileri jakinarazten zaionetik zenbatuta, edo erreklamazioa onartzeari buruzko erabakia erreklamatzaileri jakinarazi gabe hiru hilabeteko epea igarotzen denetik zenbatuta.

4.- Ebazteko sei hilabeteko epea igaro ondoren, ukituak ulertu ahalko du bere erreklamazioa ezetsi dela.

4. atala

ZEHATZEKO AHALA EGIKARITZEKO PROZEDURA

38. artikulua.- Aldez aurreko ikerketa-jarduerak.

1.- Zehapen-prozedura hasteko erabakia hartu aurretik, Datuak Babesteko Euskal Agintaritzak aurretiazko ikerketa-jarduketak egin ahalko ditu, zehatzeko ahala egikaritzeko prozedura izapidetzea justifikatzen duten egitateak eta inguruabarrak hobeto zehazteko.

2.- Aurretiazko ikerketa-jarduketak lege honen II. kapituluko 3. atalean xedatutakoaren mende egongo dira, eta gehienez ere hamabi hilabete iraungo dute, izapidetzeko onartzeari buruzko erabakia hartzen den egunetik edo erabakitzeke epea amaitzen den egunetik aurrera zenbatuta, edo Agintaritzak berak hasteko erabakia hartzen duenetik aurrera, lege honen 36. artikuluan aipatzen diren kasuetan.

39. artikulua.- Zehapen-prozedura.

1.- Ikerketarik eginez gero, haien jarduketak amaitzen direnean Datuak Babesteko Euskal Agintaritzaren lehendakariak zehapen-prozedura hasteko erabakia emango du, hala badagokio.

2.- Hasteko erabakia hartzen den egunetik, gehienez ere bederatzi hilabeteko epea egongo da ebazpena emateko. Epe hori igarotzen bada ebazpenik eman gabe, prozedura iraungi egingo da.

3.- Gainerakoan, prozedura Euskal Autonomia Erkidegoko administrazio publikoen zehatzeko ahalari buruzko araudiak erregulatuko du, hargatik eragotzi gabe kapitulu honetako 5. atalak agintzen duena.

40. artikulua.- Kautelazko neurriak.

1.- Aurretiazko ikerketa-jarduketak egiten diren bitartean edo zehapen-ahala egikaritzeko prozedura bat hasita dagoenean, Datuak Babesteko Euskal Agintaritzaren lehendakariak behin-behineko neurriak edo kautela-neurriak erabaki ahalko ditu, modu arrazoituan, datuak babesteko oinarritzko eskubidea babestearen alde beharrezko eta proportziosko diren heinean, eta, bereziki, 2016/679 (EB) Erregelamenduaren 66.1 artikuluan jasotako neurriak, datuak kautelaz blokeatzea eta eskatutako eskubideari berehala jaramon egiteko betebeharra.

2.- Era berean, Euskal Autonomia Erkidegoko administrazio publikoen zehatzeko ahalari buruzko araudian ezarrita dauden kautela-neurriak hartu ahalko ditu.

3.- Datuak Babesteko Euskal Agintaritzak uste badu datu pertsonalen tratamenduak aurrera jarraitzeak, datuok komunikatzeak edo nazioartean transferitzeak kalte larria ekar diezaioketela datu pertsonalak babesteko eskubideari, datuak blokeatzeko eta datuen tratamendua eteteko agindu diezaike tratamenduen arduradunei edo eragileei, eta, haiek aginduok bete ezean, datuak geraraz ditzake.

4.- Era berean, Datuak Babesteko Euskal Agintaritzako ikuskatzaileek, aurretiazko ikerketa-jarduketak egiten ari direla, kautela-neurriak salbuespen gisa hartu ahalko dituzte, Euskal Autonomia Erkidegoko administrazio publikoen zehatzeko ahalari buruzko araudian ezarrita dauden kasu eta baldintzetan.

5. atala

BEREZITASUNAK MUGAZ GAINDIKO TRATAMENDUEI BURUZKO PROZEDUREN KASUAN

Mugaz gaindiko prozedurei aplikatu beharreko berezitasunak, prozedura horietan Datuak Babesteko Euskal Agintaritza denean agintaritza nagusia.

Datuak Babesteko Euskal Agintaritza 2016/679 (EB) Erregelamenduaren 60. artikuluan araututako prozeduretako batean agintaritza nagusia bada, prozedura behar bezala antolatzeko beharrezkoak diren izapide eta jarduketak egin ostean ebazpen-proiektua emango du. Interesa duten gainerako agintaritzei ebazpen-proiektu horren berri emango zaie, Erregelamenduaren 60.3 artikuluan ezarrita dauden xedeetarako.

Kasu horretan, 60. artikuluan xedatuta dagoena aplikatuko da; baita, hala badagokio, 2016/679 (EB) Erregelamenduaren 63. artikuluan xedatuta dagoena ere.

42. artikulua.- Mugaz gaindiko prozedurei aplikatu beharreko berezitasunak, prozedura horietan Datuak Babesteko Euskal Agintaritza agintaritza interesduna denean, baldin eta ukitu batek berari erreklamazioa egin badio.

1.- Datuak Babesteko Euskal Agintaritza 2016/679 (EB) Erregelamenduaren 60. artikuluan araututako prozeduretako batean agintaritza interesduna bada, berari aurkeztu dioten erreklamazioaren berri emango dio agintaritza nagusiari berehala, agintaritza nagusi horrek prozedura izapidetu dezan 2016/679 (EB) Erregelamenduaren 60. artikulua araberan.

2.- Aurreko apartatuak aipatzen duen bidalketa-erabakiak prozeduraren behin-behineko artxibatzea dakar, hargatik eragotzi gabe Datuak Babesteko Euskal



Agintaritzak 2016/679 Erregelamenduaren 60. artikuluko 8. eta 9. apartatuetan jasotzen den ebazpena ematea, hala badagokio.

XEDAPEN GEHIGARRIAK

LEHENENGO XEDAPEN GEHIGARRIA. - Datuak Babesteko Euskal Agintaritzak izapidetzen dituen baina lege honetan erregulatzen ez diren prozedurei aplikatu beharreko araudia.

Administrazio-prozedura arautzeko oinarrizko legeria zein autonomia-erkidegokoa aplikatuko zaie lege honetan edo beste batzuetan ezarrita dagoenaren arabera Datuak Babesteko Euskal Agintaritzak izapidetu behar dituen prozedurei, baldin eta prozedura horiek lege honen IV. kapituluan berenberegiri araututa ez badaude.

BIGARREN XEDAPEN GEHIGARRIA. - Datuak Babesteko Euskal Bulegoa.

1.- Datuak Babesteko Euskal Agintaritzak Datuak Babesteko Euskal Bulegoaren posizio juridikoan subrogatuko da, Bulegoaren titulartasuneko ondasun, eskubide eta betebeharrei dagokienez.

2.- Ordenamendu juridikoan Datuak Babesteko Euskal Bulegoa aipatzen denean, ulertu behar da Datuak Babesteko Euskal Agintaritzak aipatzen dela.

XEDAPEN IRAGANKORRAK

LEHEN XEDAPEN IRAGANKORRA. - Datuak Babesteko Euskal Agintaritzaren araubidea.

1.- Datuak Babesteko Euskal Bulegoaren Estatutua (urriaren 18ko 309/2005 Dekretuaren bitartez onartua) aplikatuko zaio Datuak Babesteko Euskal Agintaritzari, non eta ez doan lege honetan xedatutakoaren aurka, harik eta Agintaritzaren estatutua onartzen den arte.

2.- Lege honen 8. artikuluko 5. apartatua eta 9. artikuluko 1. apartatua xedatuta dagoena aplikatuko da Datuak Babesteko Euskal Bulegoaren zuzendariaren eta lege hau indarrean jartzean Kontseilu Aholku-emailea osatzen dutenen agintaldia iraungi ondoren.

BIGARREN XEDAPEN IRAGANKORRA. - Prozeduren araubide iragankorra.

Lege hau indarrean jarri aurretik indarrean zegoen araudia aplikatuko zaie data horretan hasita dauden prozedurei edo data hori baino lehenago aurretiazko ikerketa-jarduketak hasiak dituztenei.

XEDAPEN INDARGABETZAILEA.

Lehen eta bigarren xedapen iragankorretan ezarrita dagoena ezertan ere galarazi gabe, indargabetuta geratzen dira 2/2004 Legea, otsailaren 25ekoa, Datu Pertsonaletarako Jabetza Publikoko Fitxategiei eta Datuak Babesteko Euskal Bulegoa sortzeari buruzkoa, lege hori garatzeko xedapenak eta lege honetan xedatutakoaren aurka doazen edo bertan jasotakoarekin bateraezinak diren edo kontraesanean dauden maila bereko edo apalagoko xedapen guztiak.

AZKEN XEDAPENA. - Indarrean jartzea.

Lege hau Euskal Herriko Agintaritzaren Aldizkarian argitaratu eta hurrengo egunean jarriko da indarrean.

Gobernu Kontseiluari aurkez bekio, onar dezan.

Vitoria-Gasteiz, 2022ko azaroaren 30a.

Josu Iñaki Erkoreka Gervasio

LEHENENGO LEHENDAKARIORDE ETA SEGURTASUNeko SAILBURUA